

Reykholahreppur
Maríutróð 5a
380 Reykholahreppur

Reykjavík 10. febrúar 2020
UST202001-318/B.S.
10.05.03

Efni: Drög að framkvæmdaleyfi - Vestfjarðavegur milli Bjarkarlundar og Skálaness. Umsögn

Vísað er til bréfs Reykholahrepps dags. 16. janúar sl. þar sem óskað er umsagnar Umhverfisstofnunar um ofangreint framkvæmdaleyfi vegna fyrirhugaðra framkvæmda á Vestfjarðavegi milli Bjarkarlundar og Skálaness, svokallaðri leið Þ-H en í henni felst m.a. þverun Þorskafjarðar, Djúpafjarðar og Gufufjarðar ásamt veglagningu um Teigsskóg. Umhverfisstofnun gaf umsögn um breytingu á aðalskipulagi Reykholahrepps í bréfi dags. 30. júlí 2019, en breytingartillögunni fylgir mjög ítarleg greinargerð sem umrædd drög að framkvæmdaleyfi byggja á.


Í drögunum er gerð grein fyrir því að leið Þ-H hafi mun meiri neikvæð umhverfisáhrif í för með sér en t.d. leið D og leið R, en sveitarstjórn átti frumkvæði að athugun þeirrar leiðar. Færð eru rök fyrir því að brýnir hagsmunir liggi til grundvallar ákvörðun um að raska svæði nr. 303 á náttúruminjaskrá og vistkerfum sem njóta sérstakrar verndar.


Umhverfisstofnun lagði í fyrrnefndri umsögn áherslu á að fyrst farið verði með veg um Teigsskóg verði valin leið sem liggi á jafnsléttu landi og forðist hlíðar og fjörur til að unnt verði að leggja lægri veg með minni skeringum og fyllingum. Jafnframt ætti að leggja mikla áherslu á að hanna skeringar og námur með þeim hætti að röskuð svæði falli sem best að aðliggjandi landi, auðveldi uppgræðslu og endurheimt gróðurs og dragi úr sjónrænum áhrifum.

Sveitarstjórn Reykholahrepps gerði kröfu um að byggðar yrðu tvær brýr á Djúpafirði til að tryggja full vatnsskipti, minnka straumhraða og draga þannig úr botnrofi og áhrifum á lífríki innan þverunarinnar. Vegagerðin hefur kynnt áætlanir um að eystri brúin í Djúpafirði verði metnaðarfullra mannvirki en almennt tíðkast og mun sú brú án efa setja mikinn svip á umhverfið.

Umhverfisstofnun telur að breytingar sem gerðar hafa verið á framkvæmdinni að kröfu sveitarstjórnar og landeigenda hafi verið til bóta.

Virðingarfyllt


Björn Stefánsson
Sérfræðingur


Sverrir Aðalsteinn Jónsson
Teymisstjóri